



ՀԱՅՈՑ ԵԿԵՂԵՑԻ

Մ. Ա. Յ. Ր Ա. Թ. Ո. Ռ.

Փետրվարի 28-ին Ս. Վարդանանց զորավարաց և 1036 վկայից տոնի օրը Մայր Տաճարում ս. պատարագ մատուցվեց և հոգեհանգիստ կատարվեց ազգի և հավատի համար նահատակվածների հիշատակին:

Արարողությանը ներկա էր Վեհափառ Հայրապետը:



Օշական գյուղի եկեղեցու (որտեղ գտնվում է Ս. Մեսրոպ Մաշտոցի գերեզմանը) համար քահանա ձեռնադրվեց Վազգեն Ա. մատունին:



Հյուսիսային Կովկասի և Աստրախանի թեմի Առաջնորդ Տ. Սուրեն եպիսկոպոսը, արձակվելով իր պաշտոնից, նշանակվեց Ռումինիայի թեմի Առաջնորդ և մեկնեց իր պաշտոնատեղին: Հյուսիսային Կովկասի և Աստրախանի թեմի առաջնորդական փոխանորդ նշանակվեց Արմավիր քաղաքի ավագ քահանա Տ. Վահան Թավարեկյանը:



Թեմական գործերով Մայր Աթոռ ժամանեց Բաքվի և Թուրքեստանի թեմի Առաջնորդ Տ. Ներսես եպիսկոպոսը:



Թեմական գործերով Մայր Աթոռ ժամանեցին Վրաստանի Հայոց թեմի առաջնորդական փոխանորդ Տ. Սահակ ավագ քահանա Սահակյանը և թեմական խորհրդի անդամ Փ. Մելիք-Կարապետյանը:



Էջմիածնի նորաբաց Հոգևոր ճեմարանի աշխատանքները ընթանում են նորմալ: Ուսուցչական կազմը բաղկացած է կարող ուժերից, իսկ ուսանողությունն աչքի է ընկնում իր լավ վարք ու բարբոլ և ժրջանությամբ: Մեծագործ Գեվորգ Զ-ի հիմնածայա դարբնոցում պատրաստվում են մեր ապագա շնորհալի հոգևորականները: Վեհափառ Հայրապետը անձամբ հսկում է ուսանողության առաջադիմության, սննդի, հագուստեղենի և այլ կենցաղային պայմանների բարելավման գործին:



Վեհափառ Հայրապետի ամենամեծ հոգացողության առարկան է հանդիսանում Մայր Տաճարի վերանորոգման խնդիրը: Այդ ուղղությամբ խորհրդակցություններ են տեղի ունենում Հայաստանի ականավոր ճարտարապետների ու արվեստագետների մասնակցությամբ:



Հայաստանի քաղաքներից, շրջաններից, ինչպես նաև Հայաստանից դուրս գտնվող այլ վայրերից բազմաթիվ էքսկուրսիստներ են գալիս Մայր Աթոռ, պատմական վանքի, թանգարանի և այլ տեսարժան տեղերի հետ ծանոթանալու համար: Այցելուների մեջ կան նաև Կարմիր Բանակի հայ ու օտարազգի բարձրաստիճան շատ ղինվորականներ, ինչպես նաև օտարերկրացիներ:

Թանգարանի և Մայր Տաճարի մասին բացատրություններ են տալիս Սահակ և Նղիշե վարդապետները:

